

UCAPAN TIMBALAN PERDANA MENTERI DI PEMBUKAAN PERTANDINGAN BERZANJI DI MASJID NEGARA KUALA LUMPUR PADA 27 OGOS, 1965

Yang Mulia Tuan Pengerusi,

Tuan-tuan dan Puan-puan yang hadir sekalian.

Alhamdulillah kita semua patutlah mengucapkan syukur ke hadrat Tuhan kerana pada hari yang mulia ini iaitu hari Jumaat — 27 Ogos, 1965 — ini adalah menjadi hari yang sebenar-benarnya bersejarah di dalam tawarikh negara kita yang muda ini. Pada pagi tadi, kita telah dapat menyaksikan Duli Yang Maha Mulia Seri Paduka Baginda Yang di-Pertuan Agong¹ merasmikan Pembukaan Rasmi Masjid Negara kita. Masjid ini ialah Masjid yang terbesar sekali di negara kita dan di sini akan menjadi tempat tumpuan umat Islam di Malaysia ini bukan sahaja untuk membuat amal ibadat, menjalankan kehendak-kehendak Allah Subahanahu Wataala bahkan untuk menjalankan langkah-langkah bagi memperkembangkan Agama Islam kita yang maha suci itu. Masjid ini akan menjadi pusat menyelidikan dan perkembangan Agama Islam dan juga pusat pengajian tinggi bagi agama kita yang maha suci itu. Di Masjid inilah diharap ketinggian dan perkembangan Agama Islam itu akan memancarkan sinarnya ke seluruh negara kita di Malaysia.

Pada malam ini bagi mengambil kesempatan di upacara yang bersejarah ini iaitu Pembukaan Rasmi Masjid Negara kita, kita dapat pula menyaksikan dan mendengar bacaan-bacaan berzanji daripada peserta-peserta yang terkemuka dari negeri-negeri di Malaysia ini. Temasya pada malam ini ialah sebagai merayakan hari yang mulia dan bersejarah ini.

Sebagai Pengerusi Jawatankuasa Pembinaan Masjid Negara ini, saya suka mengucapkan setinggi-tinggi terima kasih dan tahniah kepada Ahli-ahli Jawatankuasa Pertandingan Berzanji ini bagi peringkat Kebangsaan dan peringkat Negeri-negeri yang telah berusaha beberapa bulan yang lalu untuk mengadakan pertandingan-pertandingan bagi memilih peserta-peserta yang mengambil bahagian pada malam ini. Begitu juga saya mengucapkan setinggi-tinggi terima kasih kepada Ahli-ahli Jawatankuasa yang menguruskan pertandingan ini bagi pihak Kerajaan Pusat dan bagi pihak Masjid Negara ini. Dan lagi kita semua berasa besar hati disebabkan pada pertandingan malam ini ada bersama-

¹D. Y. M. M. Tuanku Syed Putra AlHaj ibni Almarhum Syed Hassan Jamalullail

sama dengan kita Dif-dif Yang Terhormat iaitu wakil-wakil daripada negara-negara sahabat kita. Saya berharap kehadiran mereka di Pembukaan Rasmi Masjid Negara ini dan di temasya pada malam ini dan juga di temasya-temasya yang lain pada beberapa hari yang akan datang, akan membolehkan mereka mengetahui dengan sepenuhnya bahawa kita di Malaysia, suka hendak bersahabat dan mempunyai perhubungan rapat dengan negara-negara asing terutama sekali Negara-negara Islam dan saya berharap Dif-dif Yang Terhormat itu akan dapat membawa balik dengan mereka, perasaan muhibbah dan tali persahabatan yang erat daripada kita semua rakyat Malaysia.

Sekian sahaja, saya ucapkan peserta-peserta dalam pertandingan ini selamat berjaya.